

Fasnacht 2005



FASNACHTSCLIQUE  
**JUNTERESSLI**

Jungi Garde + Binggis

Sujet:

## Für jede Mischt e WM

Wie wird me ohni Macht und Gäld  
Beriehmte Star uff däre Wält?  
Muesch Irgend-öppis-Meischer wärde,  
denn bringsch es wyt uff däre Ärde!  
Au die Junge Junteresser  
Dängge sich: wo simmer besser?  
Wo könnte mir als Kindergarte  
Erfolgrych zunere WM starte?

Dr Vortrab hett dr Bart scho bis zur Waade abe,  
drum göhn si an die bayrisch Schnauz- und Bartparade.  
D Binggis sinn nit Lämmli sondern unverfrore,  
und wärde an dr Schoffschur-WM zünftig gschore.  
D Drummler - vo dr Kirsistaispugg-WM zrug -  
Lade Kirsistai ab uff dr Wettstaibrugg.  
Au bi de Pfyffer tönt's hütt nit so sagedoll,  
si hänn dangg Hotdog-Fräss-WM no d Bagge voll.

Im Grund gno isch, was d machsch jo schnurz:  
E WM gits für jede Furz.

Wenn dir das SMSle uff dr Wegger goht  
Wär d Handy-Wytwurf-Schwyzermeschterschaft mi Root.  
Hesch Kische voll mit Nici oder Ju-Gi-Oh  
Kasch ane Spiel- oder e Sammel-WM goh.  
Öb Seili gumpe, Velo pumpe, Riebli schelle,  
kasch, wenn guet bisch, uff e WM-Titel zelle.  
Bisch im danze, pflanze, gluggere dr Bescht,  
gits auf für di e internäschionäll contescht.

Bi allem bisch derby, denn kurz:  
E WM gits für jede Furz.

Am liebschte sinn mir d Wettbewärb  
Usem Sing- und Dichtergwärb.  
Öb singe bi däm Music Star  
E Thema isch, isch nit ganz klar,  
bruchsch Drägg am Turnschueh ganz banal  
denn schafftsch es logger in Final.  
Bisch voll guet druff und uff dr Gass,  
Findsch Chlyklass easy, megakrass,  
muesch sicher nit dr Bättel schmeisse  
Machs Rap - dört duet das Battle heisse.  
Duesch d Sprooch so richtig durebürschte,  
trittsch d Nochfolg a vo Dichterfürschte.

An einer WM, das isch klar  
Isch jede Schieler Superstar:  
„Usrede finde“ heisst das Fach,  
s legt jedes Kind die Grosse flach:  
„Ha miesse mit em Hund go laufe“,  
„für de Eltere go Brot ikaufe“,  
„ha d Frog vergässe“, „s Heft verlore“,  
„ha miesse in dr Nase bohre“,  
„i bi allergisch uff Papyr“,  
„e nöie Gummi isch mr z tüür“,  
„ha Grippe“, „ha dr Gluggsi ka“,  
„s Huus isch abbrennt näbedra“.  
Wär d Uffzgi nonig fertig hett  
Dä hett en Usred, jedi Wett.  
Wär amigs none Stund duet schwänze  
Darf d Byspyl sälber do ergänze...

En Usred isch vyl meh als numme  
E schläcti Eigeschaft vo dumme  
Schieler ohni Pfupf und Muet.  
Si zügt vo Witz und Dichtergluet,  
vo Ifallsrychtum, Fantasie,  
vo kreativer Energie.  
I glaub drum, dass e mänge do  
An d Usred-Dicht-WM wurd go!  
Wär gwünnt, dä darf, ihr wärdet lache,  
s näggscht Johr unsere Zeedel mache!

---

D Ladäärne-Uusstellig uff em Minschterplatz und d Waage- und  
Reggwisyte-Uusstellig bi dr Kasäärne sin vom Määntig znacht bis  
am Mitwuch demoorge. Deert ka men au alli Zeedel und Schnitzel-  
bängg, d Blaggedde und dr Rädäbäng kaufe. Mer fraien ys uff lire  
Bsuech.

---

Am Frytig-Nomidaag, 18. und am Samschtig, 19. Hornig dien sich  
alli Junge Garde uff em Barfi vorstelle und hoffe uff vyl Bsuecher  
und Jungi, wo Inträssi hän.

---